

中國回教傳衍之歷史及各省回教之近況 高 勞

日本川村狂堂氏研究回教多年。在中國四川皇城寺受戒。爲回教教徒。著有論汎黃主義及支那之回教徒一文。揭布於新日本雜誌。譯其關於中國回教之兩節。以供吾國人之參考焉。

回族之初至中國也。遠在隋代。當時回民每年一回。乘風航海。至廣州福州寧波乍浦等處通商。中國人不知爲回教也。惟知其爲天方國人而已。商務漸繁。交誼從而加厚。厥後遂相互遣使。修好敦睦。而回民之來中國者。其數遂次第增加焉。

穆罕默德生於天方國。爲赤尼（一作綏尼天方國人稱中國之名稱也）五代梁之大同丙寅年。迨四十一歲。拜命於日衣列大天仙。授命爲聖。時在赤尼隋開皇六年。陳至德四年。隋文帝因天見異星。命太史占之。曰西域當出異人。乃遣使西聘。越歲始至。使者陰圖聖像。

歸。穆罕默德遣賽而德宛喝師等四人。偕隋使至赤尼。時爲隋開皇七年。陳禎明元年。是爲回教入中國之始。文帝既得聖像。懸而拜之。拜起。幅在而像亡。大駭。詰之宛喝師。對曰。吾聖人之立教。禁止拜像人之叩頭。此乃吾聖人之感應也。帝愕然。爲建懷因寺於番州（今廣東之廣州）。使宛喝師居之。其後宛喝師西還。迨穆罕默德六十三歲時。隋煬帝又遣使西聘。穆罕默德復使宛喝使偕隋使至赤尼。遂不復還。歿於廣州。其墳墓至今猶在。名爲香墳云。（墳土有香氣可以療疾）此回教再入中國之由來也。

一說謂唐太宗慕西域之美風。遣使修好。阿拉伯國王亦遣其族賽爾第蘇哈爸及甘古士等來朝。帝問之曰。爾國王治國。以何爲先。對曰。正三綱五常之外。別無奇政。帝嘉其言。勅於廣州建寺。令其居留。名之爲懷聖寺。

時在唐太宗貞觀二年。即西曆六百二十八年也。

阿拉伯國史曰。賽爾第蘇哈爸自粵東歸時。穆罕默德已謝世。問有無遺囑。廷臣言曰。無他言。惟願以可蘭經傳諸支那而已。賽乃奉可蘭經再至中國。專心傳教。太宗爲之撰文。頒於天下。於是信者日衆。此又回教行於中國之由來也。諸說紛紜。未知孰是。當時傳教者悉爲阿拉伯人。現今爲回教重鎮之雲南等地方。對於回教之史蹟。皆湮沒而無可詳考。據雲南民間之傳說。則謂古昔中國皇帝。夢見疫鬼握權。日光爲之失色。土地不生物產。甚憂之。俄有衣着阿拉伯衣之人出現。悅色和容。卽之也。溫醒而異之。召人判斷。判者曰。疫鬼握權。日光失色。物產不生。甚兇事也。悅色和容。忽焉出現者。殆阿拉伯之聖人歟。往求阿拉伯王。必得禳解之法。皇帝於是遣使阿拉伯。使達此意。阿拉伯王乃召發其臣三百六十人。使至中國。疫鬼卽遁逃。皇帝大喜。使居於都府之近傍。後以他故逐之至邊省。歷代相仍。支派遂因

而蕃衍云。

雲南之回教徒。殆於唐時從中國西北隅流傳而來。若論中國西北隅回教之來源。亦實始於唐代。當玄宗天寶年間。安祿山謀叛。明皇奔蜀。皇子逃至甘肅。長安城陷。羣臣迎皇子立之。遣使借兵於西粵。回主命葉護率精兵十萬赴援。兵士皆回教徒。葉護率以入關。陷汾陽。削平大亂。帝大嘉賞。凱旋之後。特留葉護駐長安。葉護及其將卒。遂娶中國人爲妻。久居此地。武宗之世。回民數萬。請入中國而爲民。武宗許之。使居陝西甘肅兩省。宋太宗乾德年間。喀什噶爾王布格拉率兵征土耳其斯坦。大勝。虜其國人。使居天山南北。被虜之人均奉回教。其後大半釋歸本部。所謂東干者。乃其遺族也。宋神宗熙寧年間。阿思補哈喇國王所非爾。率衆入貢於京城。帝大悅。留之使居淮泗間。封爲寧西域朝奉王。封其子賽麗爲莒國公。賽伏丁爲昭慶王。孫蘇祖沙爲寧夷侯。紹熙二年。以蘇祖沙之子坎馬丁爲統兵營帥。封

蘇祖沙之孫馬哈自爲雲中郡公會元滅金。馬哈自率兵千騎迎降。從而西征。太祖嘉之。封爲咸陽王。子納速刺丁爲延安王。忽辛爲雍國公。孫伯顏爲淮安王。伯顏察兒爲奉元王。曾孫宋的納爲滇陽侯。回教之子孫宗族。世世蒙顯爵。回訖人慕之。來居中國者踵相接。且當成吉斯汗率兵侵入中國時。其所率者多東干及回人。成吉斯汗卒。其子阿格帶亦將兵攻中國。兵士皆奉穆罕默德教者。於是回族遂遍於東土矣。其住於天山北路之回人。皆土耳其斯坦之苗裔。亦皆回教徒也。迨至清代乾隆年間。征服伊犁。盡逐克立墨一種之匪徒。僅許回人之居住。因地曠人稀。乃移陝甘二省人之信奉回教者以充實之。故伊犁土人亦漸變爲穆罕默德之教徒焉。

回教之流行於中國。在天山南路東西六千里南北一千里之間。自隋唐以來。次第隆盛。清康熙間。噶爾丹敗後。在伊犁蒙掠奪。回回首領來清乞援。康熙帝命保護

之。使居哈密。其後乾隆年間。回教徒復謀亂。帝遣兵征討。誅其頭目。駐兵於喀什噶爾、葉爾羌、英吉沙爾和闐、烏什、阿克蘇、庫車、哈密、土魯等地。以防禦回民。並命伊犁將軍以下各官。輕減回民之租稅。從事招撫。回民悅服。畏威懷德。然年月既久。任將軍者賢否不齊。其屬下之司官章京。亦養尊處優。對於回民多所徵求。租稅貢物日益加重。回民不堪苛遇。漸懷怨憤。嘉慶道光之間。回教徒張格爾。遂率衆反亂。至道光八年。始漸平定。其後同治間。南方有洪楊之變。國家多事。陝甘及關外一帶之回教徒。乃再起騷亂。雖遣兵勦討。而未能即時撲滅。各府州縣多爲回民所占據。迨洪楊亂定之後。乃由左宗棠督率練勇湘軍數萬。征討回民。先定陝甘。繼出關恢復各處之城塞。光緒二年。克喀什噶爾全疆。敕平凱旋之後。留兵二萬充邊防。以資鎮壓。光緒八年。以新疆爲行省。設巡撫一員。駐烏魯木齊（卽迪化府）。又於天山南路。設府廳州縣。哈密以西。歸新疆巡撫節制。而

西域回民。遂漸鎮靜焉。

回教徒之東至中國。隋唐當時之史蹟。湮沒不傳。無可詳考。以上所載。僅其略情。論其大要。則廣東廣西福建浙江爲一派。以廣東爲中心。南京蘇州安徽湖北湖南江西等長江一帶爲一派。以南京爲中心。皆航海而來者也。其由天山南北路以至新疆甘肅陝西之一派。則由陸路陸續東來。惟最稱隆盛之雲南回教徒。其由隴蜀南下。抑由廣東西江上溯。過廣西以至滇境。則不可考矣。

34705
回教之始至中國也。唐宋元三朝。均保護之。優待其首領。或賜以寺院。或封以爵位。或錫以撰文。至明太祖復使所非爾子孫。世襲威寧侯。且於西南二京及滇南閩粵各地。勅建清真寺。賜以御書百字讚。武宗與其侍臣共論諸教。曾爲文以褒獎之。神武皇帝亦厚遇回教徒。勅天下修建清真寺。褒賜封號。一應住持。准與冠帶。至清朝。教徒之數。非常增加。政府仍沿用懷柔之政策。溯

回教入中國以來。至今日約一千二百年。遍於全國。各省多有清真寺之建設。教徒之數。約有五千萬之多。亦盛矣哉。

回教徒之散在中國全境。從密度及地理上考之。其由天山南北以至新疆陝西之一派。則次第東漸。波及於河南山西直隸山東。更北而至於滿洲蒙古。其蔓衍之勢。至今不衰。蒙古之東部。滿洲之西部。今日殊形昌盛。不亞於其根據地之陝西也。其以南京爲中心之一派。則由江蘇傳至安徽江西湖北以至湖南。以廣東爲中心之一派。以隋文帝時宛囁師爲鼻祖。西入廣西。東入閩粵。至雲南之回教徒。其統系之無可詳考。已如前述。其貴州之回教。則或從雲南波及。抑從廣西或湖南或四川傳入。遽難判斷。若四川省內之教徒。則西部多於東部。南方多於北方。以予觀之。非由長江上溯而來。殆從甘肅流入者也。

今更就各省之回教徒。略述其概況於左。

天山南北路。天山南北路。爲古昔通天方國惟一之大道。東西往來。素稱繁盛。回族就此傳播教旨。故回教最稱隆盛。新疆省回疆一帶之地。回回教徒。占其大部分。道光間。該地教徒反亂。勢甚猖獗。竭數年之力。始克平之。新疆之回教徒。多爲純粹之中央亞細亞種族。其風俗。其習慣。及其所用之語言文字。以阿拉伯爲多。而隸俄羅斯籍者。亦復不少。

甘肅陝西。陝甘兩省之回教。已略述於前。兩省之回民。常好變亂。清末曾有戰事。繼續數年。大傷兩省之財力。至今尙未能復舊也。

甘肅省城蘭州。回教勢力。異常強大。漢族依其腋下。以營生計。常仰回族之鼻息。省城南關。全部皆屬回族。省北之甘州涼州古浪靖邊。省西之河州西寧。省南之狄道秦州泯州。省東之平涼等處。皆爲回教徒羣集之地。而河州西寧甘州涼州古浪靖遠六屬。卽謂全境皆屬教徒。亦非過言。各地之寺院。不計其數。

甘肅軍界中有權力者。世稱三馬。卽馬安良馬福祥馬元璋之三人。三人皆回教徒。於同族間。有非常之權力。馬安良在河州所率之屯田兵士。及第一次革命時升允所募之兵。共數五六萬。並有精銳快鎗及大礮數十門。其勢力殊不可侮。馬元璋乃新派回教之信徒。爲該派之大頭領。此外回教徒在甘肅居高等武官之任者。尙有五六人。袁世凱氏爲大總統時。慮甘省回教徒勢力之太盛。思有以挫削之。任張廣建爲甘肅將軍。令徐徐罷免回族之大小官。一方招致北兵。以振其威力。然亦不能如馬安良何。三馬之勢力。今猶存在也。甘肅運往他省之貨物。以牛羊皮、羊毛、煙草、藥材及食鹽之類爲多。大半由回教徒輸運。甘省之回教徒。一望而知其爲回民。蓋其骨格其容貌。與滿漢人全異。其文字亦不通用漢文。彼此之間。常用阿拉伯文字。其中籍隸俄國者。間亦有之。

陝西省亦爲回教之中心。教徒之數。較他省爲多。衛

署前後。皆爲教徒聚處之地。城內有禮拜寺七座。其大者爲唐貞觀間所勅建。省外以咸陽、三原、渭南、臨潼、高陵、大荔、華州、南鄭爲最盛。多從事於耕種牧畜及貿易。身家頗爲殷實。且有就職之大小武官。此外各縣村堡市鎮。莫不有回教民之踪跡。回民聚居之處。必有禮拜寺。

雲南 回教之傳至雲南。已如上述。自元代而後。教徒之雜居此地者甚多。據教中所傳說。謂八世紀中。巴格達得之教主。徇吐魯番主之請。遣土耳其兵三千。助其侵略雲南。事平之後。回教兵因與食豬肉之中國兵爲伍。不得歸國。遂居留其地。云雲南回漢兩民。常有爭鬪。清咸豐五年。雲南各地回民反亂。官軍疊次失敗。至同治十一年。始克平定。此役前後費時二十三年。雲南人口。因之喪其大半。所餘者僅六百萬。乃至一千萬人而已。雲南人至今尙多自稱爲從天方國移住之子孫者。當第三次革命時。蔡鍔所率之軍隊。轉戰各地。異常奮

勇。其多數皆回教徒也。

直隸省 回教徒之居住直隸省者。數亦不少。其中最盛之地爲通州。約有三萬人。多住於北門外及城內南岸。有宏大之禮拜寺兩座。中國北境而有回民如此之夥。實所稀見。彼等職業。爲苦力、小商人、馬車店、理髮店。而尤以當兵爲最多。前駐通州之提督馬玉崑。亦回教信徒。其部下兵丁及各隊長。皆回教徒也。

北京回教亦甚熾盛。小商人、羊肉店、車夫、苦力、兵丁。十中八九皆爲回教徒。北京城西有回教徒之一部。不通華語。沿用其純粹阿拉伯之風俗。又外城有稱爲牛街者。有戶數一千餘。悉爲回民。是等回教徒。體格上容貌顏色上。與普通中國人甚易區別。蓋彼等不與中國人之血緣相混。仍保有其中亞細亞之統系。言語不通。與普通中國人絕少往來。仍用阿拉伯之言語。北京清真寺之數。共有四十餘座。勅建者亦有二三座。天津清真寺。大者凡四座。有三座相並建設。中爲清真寺。



34708

北爲清真北寺。南爲清真南寺。其四旁所住之回民。皆有門牌。一見卽知其爲教徒也。

四川省 川省之回教。省西以打箭爐、天全、蘆山、邛州、新津、崇慶、溫江、雙流、眉山、彭山、寧遠等。北方以茂州、汶州、灌、崇甯、邛、彭、新繁、新都、石原、綿州、漢、德陽、麗江、綿竹、什邡、平武等。爲最多。而省垣尤盛。有回民專門之新式小學校及女學校。禮拜寺有皇城寺、東寺、西寺、江南寺、北寺、鼓樓寺、義學寺、七寺、八寺、九寺、十寺及土橋場之上寺、下寺等十三座。回民多聚居於衙署之前後左右。身家殷實者甚多。其營業爲飲食店、茶店、茶食店。又省東如重慶、資陽及其他各地。回教徒亦不少。重慶有大禮拜寺二座。

湖北省 鄂中回教亦盛行。武昌近傍有清真寺六座。此外約每隔十五里。卽有一寺。其盛況可見一斑矣。

湖南省 湖南回教徒。約占人口平均十分之一。就常德一府言之。則占市民三分之一。數在五萬以上。該教

徒現尙竭力傳播其教旨也。長沙有清真寺二座。

江蘇省 江蘇回教之流行。亞於雲南。江寧有清真寺

四十八座。(中有勅建者)蘇州有二座。上海有一座。

安徽省 安慶有清真寺二座。蕪湖一座。其他各地亦

有回教之蹤跡。

江西省 九江有清真寺一座。此外未詳。

河南省 河南爲中國古來有名之地方。各地皆有清

真寺。就輸出多量之牛皮一節觀之。則回教徒之夥。不

難察知矣。

廣西省 廣西回教徒。與苗雜居。常有騷擾地方之事。

山東省 山東爲孔子之鄉里。意必儒教獨占其勢力。

而抑知不然。該省回教。稍亞於直隸。然亦甚爲殷盛。近

時滿洲回教徒。次第增多。雖該教勢力之發展。而教徒

由山東移往。亦其一因焉。山東回教徒。有與他省異者。

非如他省之聚居一隅。而散處於全省各地。故無可指

稱之地域也。